

## მწარე გაკვეთილი

თბილისი. “ლოკომოტივის” სტადიონი. 2 მაისი.

“დინამო” (თბილისი) - “არარატი” (ერევანი) - 0:4 (0:1).

“დინამო”: ურუშაძე, კანთელაძე, ებრალიძე, ხურცილავა, მაჩაიძე, პეტრიაშვილი, კუტივაძე, ასათიანი (მჭედლიშვილი, მეტრეველი), გავაშელი, გ. ნოღია, ლ. ნოღია.

“არარატი”: ა. აბრამიანი, ავანესიანი, ფ. აბრამიანი, კოვალენკო, მესროპიანი, ანდრეასიანი, ბონდარენკო, იშტოიანი, მარქაროვი, ზანაზანიანი, კაზარიანი.

მსაჯი: ა. ივანოვი (ლენინგრადი).

დუბლიორები - 3:0 “დინამოს” სასარგებლოდ.

თბილისის “დინამოს” თავისი კალენდარული შეხვედრა სომხეთის საუკეთესო გუნდთან პირველად 1949 წელს ჰქონდა. მას შემდეგ დიდმა დრომ განვლო. ერევნელებმა გარკვეული მიღწევები მოიპოვეს (ვთქვათ, VIII ადგილი ჩემპიონატში), ჰქონდათ აშკარა ჩავარდნებიც, როცა XVII და XVIII ადგილებს იკავებდნენ და იძულებული იყვნენ დაეტოვებინათ უმაღლესი ლიგა. ამ ხნის განმავლობაში თბილისის “დინამო” სსრ კავშირის ჩემპიონიც იყო, მეორე და მესამე პრიზიორიც, და არც ერთხელ არ ყოფილა შემთხვევა, “არარატს” დინამოელებზე უკეთესი ადგილი დაეკავებინოს გათამაშების საბოლოო ცხრილში.

მაგრამ ეტყობა, არის ისეთი საფეხბურთო ტრადიციები და კონკრეტული დამოკიდებულებანი გუნდებს შორის, რომლებიც არ ემორჩილებიან სტატისტიკურ ციფრებსა და გამოთვლებს, გვერდს უხვევენ წინასწარ რეცეპტებს და თავიანთი დაუნერვლი კანონების გზით მიემართებიან. სწორედ ასეთი ტრადიციები აქვთ ერთმანეთთან თბილისის “დინამოსა” და “არარატს”. აქ შეხვედრით ასეთ ციფრებსაც: 7:4, 5:0, 5:1, 3:0 და ამ ანგარიშით ხან ერთი გუნდი იმარჯვებს, ხან მეორე.

ვიმეორებთ, “არარატი” არასოდეს ყოფილა თბილისის “დინამოზე” მაღლა და თუ მიაღწევდა ხოლმე წარმატებას მასთან შეხვედრაში, ეს ხდებოდა ნებისყოფის იმ უმაგალითო დაძაბვისა და მობილიზების შედეგად, რომელსაც ერევნელები აღწევდნენ. უკანასკნელი ასეთი შემთხვევა იყო შარშანდელი გათამაშების პირველ წრეში, როცა “არარატმა” შინ სძლია “დინამოს” ანგარიშით 3:0.

მაგრამ ჩვენს თავს უფლებას მივცემთ და ვიტყვით, რომ შარშანდელი და წლევეანდელი “არარატი” ეს ცა და დედამიწაა. იმავე შარშანდელ მატჩში ერევნელები თავგანწირულად იბრძოდნენ და გაიმარჯვეს უმთავრესად თბილისელთა ინერტული, ყოვლად უსუსური თამაშის შედეგად. ახლა კი “არარატი” არა მარტო იბრძვის, იგი თამაშობს, თამაშობს ნამდვილ თანამედროვე ფეხბურთს, გეგმიანს, მოთუქრებულს, ტექნიკურს, აზრიანს. სადღაა ის უხეში, ძალისმიერი მანერა, რომელიც უწინ ერევნელ ფეხბურთელებს ახასიათებდათ. ახლა ამ გუნდში არიან მაღალი კლასის მოთამაშეები, რომლებმაც საუცხოოდ იციან თავიანთი საქმე, რომლებიც ბურთს ფლობენ დახვეწილად, დამაჯერებლად, ოსტატურად. “არარატს” არა აქვს სუსტი ადგილი, ხოლო იშტოიანი, მარქაროვი, კაზარიანი, ზანაზანიანი, ანდრეასიანი და სხვანი, რომელიც გნებავთ პირველხარისხოვან გუნდს დაამშვენებდნენ. ამიტომაც, რომ ზოგიერთი მათგანი სსრ კავშირის ოლიმპიური ნაკრების წევრია, ოლიმპიური გუნდიდან კი ეროვნულ ნაკრებამდე ერთი ნაბიჯია.

ყოველივე ეს კარგად იციან თბილისელებმა და მათმა მწვრთნელებმა. შორს წასვლა არ გვინდა - თასის ამასწინდელ ორ მერვედფინალურ მატჩში ყველაფერი ეს ნათლად ჩანდა. ესე იგი, “არარატის” ნამდვილი სპორტული ძალა სიურპრიზი არ უნდა ყოფილიყო ჩვენი კოლექტივისთვის.

რით შეიძლება გავამართლოთ ან, თუნდაც, ავხსნათ დინამოელთა ეს სამარცხვინო წაგება? მართალია, მათ აკლდათ ძირითადი განაპირა მცველები ძოძუაშვილი და ხინჩაგაშვილი, მართალია, დაიწყო თუ არა თამაში, მე-2 წუთზე დაშავდა ასათიანი (ნახევარდაცვის წამყვანი მოთამაშის არყოლა ძალზე მძიმედ დაემჩნა გუნდს), მაგრამ გავაკეთოთ ეს კომპრომისი და 3 ძირითადი ფეხბურთელის დანაკლისით მივცეთ გარკვეული შეღავათი თბილისელებს. მაგრამ 0:4 და ისიც საკუთარ მინდორზე?

რა გამართლება აქვთ ჩვენს ფეხბურთელებს იმაში, რომ, როცა მათს კარში 77-ე წუთზე მარქაროვმა მეორე ბურთი გაიტანა, მათ თითქმის შეწყვიტეს აქტიური წინააღმდეგობა და არსებითად მეტოქის მოწყალების იმედით დარჩნენ? საკითხავია, რატომ დასჯერდებოდა “არარატი” ორ გოლს, როცა მესამის და მეოთხის გატანაც შეეძლო: დინამოელები ამ დროს ფაქტიურად ხომ აღარ იბრძოდნენ?!

ზედმეტად მიგვაჩნია ლაპარაკი მატჩის დეტალებზე, როცა შეხვედრა თბილისელებმა მთლიანად უმწეოდ ჩაატარეს. პერიოდული ტერიტორიული უპირატესობა, ორიოდე სახიფათო მომენტი ვერ ცვლის საერთო სურათს: “დინამო” ძალიან სუსტი იყო. ჩვენი თავდასხმა თითქმის ყველა ბურთს აგებს მეტოქის დაცვასთან და სწორედ ამიტომაც, რომ ხუთ მატჩში სულ 3 გოლი აქვს გატანილი და ყველა მხოლოდ ერთ ფორვარდს ეკუთვნის - გავაშელს. მაშ რა მოვალეობა აკისრიათ ძმებს ნოდებს - გივის და ლევანს?

ასათიანის შემცვლელი მჭედლიშვილი სხვებზე უარესი არ იყო, მწვრთნელებმა კი იგი გაიყვანეს მინდვრიდან და მის ნაცვლად მეტრეველს მისცეს ადგილი. შესაცვლელი სხვები იყვნენ, თუნდაც კუტივაძე, რომლის ფიზიკური მომზადება შორსაა სასურველისგან. ამას გარდა, მეტრეველს იოტის ოდენა სარგებელი არ მიუცია გუნდისთვის.

ჩვენ არაერთხელ გამოგვითქვამს კრიტიკული შენიშვნა იმის თაობაზე, რომ თბილისის “დინამოს” ნახევარმცველთა თამაში არ დგას თანამედროვე მოთხოვნათა დონეზე. შუა მინდორზე ისინი უზომოდ აყოვნებენ ბურთს, ატარებენ გაუთავებლად, არა აქვთ თავისუფალი მანევრის უნარი. ამ მატჩში, მაგალითად, ისინი სისტემატურად აწვდიდნენ მაღალ ბურთებს წინ, მაგრამ არც გავაშელი, არც ორივე ნოდია არ არიან თავით თამაშის ოსტატები.

ძალზე უკბილოდ გამოიყურება ჩვენი თავდასხმა. თავისუფალი ადგილის შერჩევა არ იცის თბილისელთა არც ერთმა ფორვარდმა და მათი კომბინაციები, როგორც წესი, ერთ სვლას თუ აღწევს. მერე კომბინაცია ჩიხში ემწყვდევა. ამ მხრივ არარატელთა თამაში დღევანდელი ფეხბურთის ნამდვილი დემონსტრაცია იყო. თუ ბურთი აქვს ერთ-ერთ მათგანს, 2-3 პარტნიორი მაშინვე, წამის დაუკარგავად იხსნება და გადამწოდებელი ღარიბი არჩევანის წინაშე კი არაა, პირიქით, უკეთესს ეძებს.

ერთი სიტყვით, 0:4 მწარე გაკვეთილია თბილისის “დინამოსთვის”, რომლის თითოეულმა წევრმა ღრმა ანალიზი უნდა გაუკეთოს განვლილ მატჩს, ჩაუთქვრდეს შექმნილ მდგომარეობას და ყველა ღონეს მიმართოს მის გამოსასწორებლად. ეს ლიტონი სიტყვები არაა. ლაპარაკია ჩვენი გუნდის ანმყოფა და მომავალზე, მის ავ-

კარგზე, ეს კი შორს ხვდება ერთი წაგებული მატჩით გამოწვეული უსიამოვნების გრძნობას.

დაბოლოს, სტატისტიკისთვის, გატანილი გოლების შესახებ: ანგარიში მე-16 წუთზე გახსნა ზანაზანიანმა, შემდეგ “არარატი” წინ გაიყვანა მარქაროვმა, მანვე მესამედ აიძულა ურუშაძე ბადიდან გამოეტანა ბურთი, საქმე კი კოვალენკომ მოათავა.

**რ. ქორიძე.**

**“ლელო”, 4 მაისი, 1971 წ.**